



Emna da chor en Lumnezia

54 cantadur(a)s – per gronda part da la Bassa – en sa participads a l'arranschament a Vignogn.

4



In nov cudesch da sur Sep Fidel Sievi

Venderdi proxim è la preschenta-ziun dal cudesch «In trianghel a Laax».

6

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Campionadi mundial a Flem Laax

■ (anr/hh) Flem e Laax astgan selegrar sin in grond arranschament da sport internaziunal. 2023 han ils campionadis mundials da cuorsa d'orientaziun numnadamein liug ella regiun. La candidatura inoltrada dalla Svizra ha perschaduu la suprastanza dall'associaziun internaziunala. Suenter 1981, 2003 e 2012 eis ei la quarta ga che quels campionadis mundials han liug en Svizra.

Tinnitus ed ogets chi discuorran

■ (anr/sp) Il rom da las festivitats da 100 ons Lia Rumantscha han Flurina Badel e Tina Planta-Vital prelet our da lur novas ouvras da poesia. Al listess di ha Göri Klainguti festagià la vernissascha da seis cudesch «Na, ogets nu discuorran!» «Il matador local, o il Gian Marchet Colani da Zuoz.» Uschè ha Claudio Spescha preschentà a Klainguti, chi ha prelet ün pèr da sias novas istorgias chi sun per gronda part scrites in fuorma da dialog tanter l'autur ed ün oget. Eir Flurina Badel chi ha fat adöver da plets inventats da Klainguti, ha recità da sias poesias dal cudesch «Tinnitus tropic». E Tina Planta-Vital ha prelet da sias poesias our dal cudesch «Il blau tocca la terra».

> PAGINA 8

Animals da rapina: Schanza ni resca?

■ (anr/hh) Il retuorn dil luf, il luf-tscherver ed igl uors ella cuntrada culturala ensiara in potenzial da conflicts. Míntg'onn seforman novas populaziuns da lufs en Svizra, Tiaratudestga ed Austria e novs lufs vegnan neutier dall'Italia e la Slovenia. Co duein quels animals vegnir tractai? Nov persunas cun savida fundada ella biologia, l'ecologia ed il management dalla selvaschina ein sedecidi d'edir comunablaein in cudisch davart quella problematica, mo era schanza. En quella publicaziun cun rodund 300 paginas, biars maletgs ed illustraziuns, vegnan ils camps da conflict catscha ed agricultura tematisai profundamein. Medemamein vegn fatg propostas per soluziuns.

> PAGINA 4

Servetsch d'abunents e da distribuziun: tel. 0844 226 226 mail: abo@somedia.ch



Unitad malgrà diversidad dat forza

Act final da la Festa da giubileum da la Lia Rumantscha a Zuoz

DA MARTIN CABALZAR

■ **Malgrà la digren numerica alarmanta impressiunescha la Rumantschia adina puspe tras ina vitalidad culturala sorprendenta. Quai è puspe sa manifestà a moda evidenta e persvadenta a chaschun dal giubileum da 100 onns Lia Rumantscha.** A l'act festiv e final dal giubileum han chant e musica, in element caracteristic dals Rumantschs, procurà ina giada dapli per in'avischinaziun e da schientscha ed identitad rumantscha. Il venderdi ha la scena litterara demonstrà ch'ella è pli viva e viscla che mai, cunzunt era tar las dunnas e la generaziun giuvna. Represchentants da la scola e furmaziun han rendi attents a la heterogenitad ed a las novas sfidas, dentant era cumprovà chi vegn fatg fitg blier per mantegnair il rumantsch da la scolina fin a l'universitad. En in di tematic ha la giuventetgna da la GiuRu svilupà novas ideas e dà novs impuls. La famiglia rumantscha è vegnida plidentada cun divers arranschaments specials. Guntgì



La Lia Rumantscha è fitg cuntenta dal grond interess e dals blers resuns positivs per ses giubileum. FOTO: M.WENDT

han ins – sapientiv ni negligent – la discussiun brisanta, dentant necessaria davart la rolla futura dal rumantsch grischun e dals idioms e da las sfidas da la pressa rumantscha en vista a la transfurmaziun digitala. Betg vegnids a

la curta èn ils contacts persunals ed il star da cumpagnia. Malgrad la digren marcanta na datti nagins signals da resignaziun, anzi blers oraturs han appellà al spiert cumbattiv dals Rumantschs. Resta da sperar ch'ils impuls in-

novativs daventian e restian persistents e ch'ins na stoppia betg puspe spitgar 20 onns sin la proxima scuntrada interruman-tscha!

> COMMENTARI E PAGINAS 2,3,7 E 8.

Lumbrein ha giubilau

100 onns Societad Ovra electrica Lumbrein

DA HANS HUONDER / ANR

■ **Cun in di dallas portas aviartas ha la Societad Ovra electrica Lumbrein terminau la sonda sias festivitats pil giubileum da 100 onns.** Ils responsabels dall'ovra han dau la caschun alla populaziun da prender investa dils indrezs e da star da cumpignia. El center da quella davosa part d'arranschaments en connex cul giubileum ei in plaid da cusseglier naziunal Martin Candinas staus.

En quel ha el buca mo ludau il spért innovativ dils pioniers e fundaturs dall'ovra, mobein dall'entira vischnaunca da Lumbrein ch'ei oz part dalla vischnaunca da Lumnezia. El ha denton era fatg in pign excuors ella politica d'energia federala, puntuond con impurtontas che las entradas ord la forza hidraulica seigien pil cantun e las vischnauncas.

> PAGINA 4



Cusseglier naziunal Martin Candinas (sen.) en discussiun cul president dalla Societad Ovra electrica Lumbrein, Gian Derungs. FOTO: H. HUONDER

Mustér ha festivau

Fiasta dil vitg cun program variont

DA HANS HUONDER / ANR

■ **Per la secunda ga suenter 2017 ha l'union Viva Disentis organisau la sonda vargada la fiasta dil vitg a Mustér. Il motto «veta el vitg».** La gronda e varionta purschida ha lu era procurau per veta, e quei el ver senn dil plaid. Silla piazza avon casa communal, dalla Via da scola e la Via Cons siadora entochen sin la piazza avon Puntreis han unius e fatschentas offeriu als nu-

merus presents bia bien ed interessant. La purschida cun biars products dalla regiun ei vegnida completada cun giugs e musica. Aschia ha in e scadin, pign e grond anflau enzatgei che ha plaschiu e divertiu. Mo buca mo quei: La fiasta dil vitg ha era purschiu la caschun da s'entupar e da star da cumpignia. Da quella caschun ei vegniu fatg stedia-mein diever.

> PAGINA 5



Perfetg: Enzatgei bien, cuschinau cun plascher. FOTO: H. HUONDER

■ COMMENTARI

La festa è finida la lavur entschaiva

DA MARTIN CABALZAR

La Lia Rumantscha festiva da camifo ses giubileum tschientenar. Quest inscunter interruman-tscha cun referats, discussiuns, lavuratori, teater, chant e musica è stà impurtant per sensibilisar la populaziun rumantscha ed allertar l'ulteriura populaziun grischuna e svizra per la valita, las prestaziuns e las pitgiras dal rumantsch. Ils inscunters persunals e las discussiuns cuntraversas èn stadas constructivas e dattan impuls per pudair agir stagl da stuaier reagir. Entant ch'ins ha magari gi l'impressiun ch'il slantsch e la dinamica sajan s'endurmentads in zichel ils ultims onns, hai dà a Zuoz novs signals da vitalitad e voluntad da surviver. Era tuns alarmants e critica n'han betg mancà. Da la LR spetgan ins dapli engaschi, dapli curaschi ed agir consequent. Savens è la LR dentant era stada l'unfrenda d'interess particulars e da charplinas che smasan sia forza e ses effect. Las forzas sparpagliantas èn savens pli fermas che las stentas d'unir. Per avair vigur e success dovri dentant in consens minimal ed ina tscherta unitad, malgrà la diversitad.

Per che las festivitats da giubileum bajan in effect persistent e na sa sperdian betg en plets festivs, flosclas nunliantats e buns propiests, ston ins uss formular cleras fnamiras, elavurar cleras strategias e definir in agir pli concret, consequent ed insistent. Per exempel cun ina nova instanza bain documentada ed accumpagnada d'in lobbying politic correspondent per in augment substanzial dal sustegn statal.

La finala na pon ins dentant era betg salvar il rumantsch mo cun paragrafs e daners. Ed ins na dasga era betg adina quintar e sa fidar mo dal salvament entras il stadi. Anzi. Il destin dal rumantsch giascha primarmain en ils mauns dals Rumantschs sez, tenor il vegl proverb: In pievel viva sch'el vul viver!

martin.cabalzar@somedia.ch